

四庫全書

史部

欽定四庫全書

欽定續文獻通考卷二百

帝系考

太上皇

遼金元
明皆無

太皇太后 皇太后

宋理宗即位尊楊皇后曰皇太后同聽政寶慶三年上尊號曰壽明皇太后紹定元年加上慈睿三年又加仁福五年崩謚曰恭聖仁烈皇后

臣等謹按此即馬端臨考所載壽明皇后也但彼

列后妃門且畧而未備今詳載於此

度宗即位尊皇后謝氏曰皇太后咸淳三年上尊號曰
壽和皇太后五年加上聖福恭帝即位尊為太皇太后
宋亡降於元降封壽春郡夫人越七年終

恭帝即位尊母全皇后為皇太后宋亡從恭帝入朝於
燕京後為尼而終

端宗即位冊母楊淑妃為太后同聽政及聞帝昺投海
死亦自沈於海

遼太祖即位尊母蕭氏為皇太后太后字伊木沁約尼氏宰相塔喇之女太宗即位尊為太皇太后天顯八年崩興宗重熙二十一年追謚宣簡皇后

臣等謹按此即后妃傳所載德祖宣簡皇后蕭氏也傳稱天顯十一年崩祔德陵而太宗紀八年十一月太皇太后崩遣使告哀於晉九年葬於德陵則傳文之誤明矣又后妃傳篇首云太祖稱帝尊祖母曰太皇太后母曰皇太后王圻續通考採而

載之今考太祖元年紀並無尊祖母之文契丹國志亦無可考太祖之祖母乃元祖簡獻皇后蕭氏傳中亦不詳其崩於何年記載多疎弗可深考矣又按契丹國志與續綱目皆言太祖舒嚕后有母有姑皆踞榻受其拜夫使舒嚕后受姑之拜則姑之未尊為皇太后可知此契丹國志綱目所以無尊為皇太后之文也今以正史為據而載之且疑受拜之事或未可信

太宗即位尊母蕭氏為應天皇后會同初晉使馮道
韋勲上尊號曰廣德至仁昭烈崇簡太宗崩世宗即位
於鎮陽太后遣少子魯呼以兵逆擊相持數日各罷兵
趨上京既而聞太后魯呼復有異謀遷於祖州穆宗應
歷三年崩謚曰貞烈重熙中更謚淳慶

世宗即位尊母蕭氏

義宗之妃

為皇太后天祿五年察克作

亂被弑興宗重熙二十年謚柔貞

臣等謹按義宗妃尊為后者二人一謚端順一謚

柔貞見義宗傳端順后應先薨義宗傳與世宗紀
皆不詳載

聖宗即位尊母蕭氏為皇太后攝國政統和元年上尊

號曰承天皇太后二十四年加上尊號曰睿德神畧應

運啟化

契丹國志於睿德神畧應運啟化
下尚有法道洪仁聖武開統八字

二十七年崩

謚曰聖神宣獻重熙二十年改謚睿知

聖宗紀曰統和元年五月詔近臣議皇太后上尊

號冊禮樞密使韓德度以後漢太后臨朝故事草

定上之

臣等謹按后妃傳云聖宗時皇太后攝國政明達治道聞善必從故羣臣咸竭其才習知軍政澶淵之後將士用命聖宗稱遼盛主后教訓為多契丹國志亦云聖宗年少太后專政武功殿聖宗居之文化殿太后居之

興宗即位母元妃蕭氏自立為太后攝政重熙元年上尊號曰法天應運仁德章聖二十三年加上尊號曰仁

慈聖善欽孝廣德安靜貞純懿和寬厚崇覺儀天道宗
立尊為太皇太后清寧三年崩謚曰欽哀

契丹國志曰聖宗臨崩屬子宗真曰皇后事我四
十年以其無子故命汝為嗣我死汝母子切毋殺
之遺命以齊天為皇太后順聖為太妃元妃匿之
自為皇太后令人誣告齊天謀叛囚於上京縊殺
之

臣等謹按興宗紀載尊母元妃蕭氏為皇太后而

后妃傳則書自立為皇太后考紀文興宗初年皇太后聽政帝不親庶務羣臣表請不從重熙三年五月皇太后還政於帝躬守慶陵與傳云重熙三年后陰欲立少子重元重元以所謀白帝乃收太后符璽遷於慶州七括宮之事相合則當興宗初立未親庶政傳中自立之書法信矣第紀載重熙八年始迎太后還京二十三年始上尊號曰仁慈聖善云云與重熙元年之尊號固兩相異也今后

妃傳中乃以二十三年之尊號屬之元年而謂六
年秋即奉迎侍養獨不考七年二月尚有遣使慶
州問安之事耶史筆舛錯如此

道宗即位尊母皇后蕭氏為皇太后清寧二年上尊號
曰慈懿仁和王惠孝敬廣愛宗天

前為后時已上尊號
此是為太后尊號

太康二年崩謚曰仁懿

臣等謹按契丹國志云尊為睿聖洪慈順天皇太
后徽號與史傳不同又云清寧五年崩與太康二

年亦差十餘年矣

金熙宗天會

仍太宗年號

十三年九月尊太祖后赫舍哩氏

為太皇太后十四年正月崩謚曰欽憲

又尊太宗后唐古氏為太皇太后皇統三年三月崩謚

曰欽仁

臣等謹按金太祖太宗之世雖正位建元而禮儀未備如太祖將伐遼入見肅宗宣靖皇后富察氏后命太祖正坐號令諸將自後太祖每出師還輒

率諸將上謁獻所俘獲此豈非以太后之禮奉之者而名號未崇紀載闕如故今所纂輯斷自熙宗

時始

海陵天德二年正月尊嫡母圖克坦氏為皇太后正隆六年八月弑之大定間謚曰哀及宗幹降封遼王后亦追降為妃

又尊生母大氏為皇太后貞元元年四月崩謚曰慈憲大定七年降封太妃削謚號及宗幹降封遼王追降大

氏與順妃李氏寧妃蕭氏文妃圖克坦氏俱為夫人

金史后妃傳曰圖克坦氏宗幹正室無子次室李氏生鄭王充大氏生三子長即海陵也大氏事圖克坦甚謹相得歡甚海陵以其母嫡妾之分心常不安及弑熙宗圖克坦見海陵不賀海陵銜之至天德四年海陵遷中都獨留圖克坦於上京大氏常思念之貞元元年大氏臨終謂海陵必迎致之三年迎至中都海陵外極恭順太后以為誠然及

謀伐宋諫止之海陵益不悅樞密使布薩師恭征
契丹辭謁太后太后言涉江伐宋疲弊中國我嘗
諫止之不聽契丹事復如此奈何海陵意太后以
充為子充四子皆成立恐師恭將兵在外太后或
有異圖乃使人弑太后并令殺太后同乳妹安圖
及郡君博索額嚕溫徹辰等自軍中召師恭還殺
之

章宗即位尊母圖克坦氏為皇太后

顯宗之妃

明昌二年崩

諡曰孝懿

后妃傳曰后父貞尚遼王宗幹女梁國公主后生
章宗明昌元年禮官議以五月奉上冊寶后弗許
帝屢為之請后曰世宗服未終遽衣錦繡佩珠玉
於禮何安當俟服闋行之帝諭有司曰太后執意
甚堅其待來年明昌二年正月崩

哀宗即位尊母皇后溫都氏

本姓王氏賜
姓溫都氏

為皇太后天

興元年京城破后北遷不知所終

又尊生母元妃溫都氏

即王皇后之女兄

為皇太后正大八年

七月崩諡曰明惠

元成宗即位尊太母元妃伯奇音濟齊鴻吉哩氏

裕宗之妃

為皇太后大德四年崩諡曰裕聖皇后至大三年加諡

徽仁

臣等謹按元史定宗紀與后妃傳載太宗崩六皇

后魯瑪錦氏稱制攝國者五年定宗立朝政多出

於后此豈非定宗所當尊為皇太后者乎定宗憲

宗二朝本紀禮文未備無尊為太后之文惟憲宗
二年正月紀有皇太后崩四字邵經邦弘簡錄以
為此乃憲宗生母莊聖皇后縹勒噶塔納奇唎氏
也憲宗元年亦未嘗有尊生母為皇太后之文皆
無可詳考又王圻續通考有世祖時尊后鴻吉哩
氏為皇太后一條考世祖初年紀文並無此事且
世祖與憲宗同母乃奇唎氏世祖之后二人則皆
鴻吉哩氏王圻所載誤甚故今所纂輯斷自成宗

朝始

成宗即位尊太母元妃伯藍也怯赤弘吉剌氏

裕宗之妃

為

皇太后大德四年崩謚曰裕聖皇后至大三年加謚徽

仁

武宗即位尊太母元妃塔濟鴻吉哩氏為皇太后后為

阿禪孫昆都特穆爾之女

順宗之妃

至大三年上尊號曰儀

天興聖慈仁昭懿壽元仁宗延祐二年加上尊號曰全

德泰寧福慶英宗即位尊為太皇太后加上尊號曰徽

文宗祐至治二年九月崩謚曰昭獻元聖

臣等謹按昭獻元聖皇后后妃傳書至治三年二月崩紀作二年九月崩今考紀文至治二年十二月已有定謚太皇太后曰昭獻元聖之文是紀是而傳非矣

英宗即位尊母鴻吉哩氏為太后

臣等謹按此即仁宗莊懿慈聖皇后鴻吉哩氏也
傳曰英宗即位上尊號為皇太后至治二年崩考

英宗紀延祐七年正月仁宗崩三月帝即位頒詔天下尊太后為太皇太后並無尊皇后為皇太后之語八月祔仁宗聖文欽孝皇帝莊懿慈聖皇后於太廟其明年始改為至治元年則傳云至治二年崩之謬明矣表云延祐七年上尊謚與祔廟之事相符但傳中備載即位時上皇太后尊號之冊文皆是生前崇奉之語其至治二年上謚冊中有云為天下母而養弗逮履天子位而報則豐則又

似未曾身為皇太后者續通鑑綱目延祐七年七月既並書尊皇太后為太皇太后尊皇后為皇太后矣後止書太皇太后崩而皇太后崩失載邵遠平續弘簡錄載英宗嗣位尊為皇太后之冊文與元史后妃傳無異然后妃傳止曰遣某官某奉冊上尊號而已弘簡錄乃備書儀天興聖慈仁昭懿壽元全德泰寧福慶之尊號此乃仁宗延祐三年加上順宗元妃為皇太后之號而英宗即位再加

徽文崇祐尊為太皇太后者也其誤滋甚王圻續
通考不載此事當亦闕疑之意也第思后果未曾
為太后則必崩於仁宗朝而仁宗紀並未一書且
后妃傳所載尊為皇太后之冊文語似可據意者
仁宗崩時后猶未崩曾有尊為太后之事未幾即
崩距仁宗之崩不遠故於八月同祔太廟乎今據
傳文書之而存其疑以俟考焉

寧宗即位尊文宗皇后鴻吉哩氏為皇太后順帝元統

二年上尊號曰贊天開聖仁壽徽懿昭宣至元元年八月詔議加禮乃議尊皇太后為太皇太后加上尊號曰贊天開聖徽懿宣昭貞文慈祐儲善衍慶福元六年六月撤文宗廟主詔去太皇太后尊號安置東安州尋崩續通鑑綱目曰至元二年尊為太皇太后許有壬諫以為非禮且言推恩之法近重而遠輕今尊皇太后為太皇太后是推而遠之乃反輕矣監察御史台哈布哈率同列上章言嬪母不宜加徽稱太

后聞之怒欲殺言者既而怒解曰風憲有臣如此豈不能守祖宗之法乎命賜金幣以旌其直

至元元年詔曰永惟皇太后後其所生之子一以至公為心親挈大寶昇予兄弟定策兩朝功德隆盛雖嘗奉上尊號朕心猶為未盡命大臣特議加禮至六年六月詔曰叔孀布達實哩恃其勢燄不立明考之冢嗣而立孺稚之弟伊埒哲伯奄復不年諸王大臣以賢以長扶朕踐位國之大政屬不

自遂者詎能枚舉布達實哩本朕之孀乃陰構奸臣弗體朕意僭膺太皇太后之號迹其閨門之禍罪惡尤重削其鴻名徙東安州安置

明惠帝建文元年尊母妃呂氏

興宗妃

為皇太后后壽州

人太常卿本之女四年燕兵入太后隨其子允熙居興宗陵永樂元年復稱皇嫂懿文太子妃

臣等謹按呂后為興宗繼妃興宗元妃常氏開平

王遇春女洪武十一年薨謚敬懿惠帝即位追尊

孝康皇后成祖復降稱為太子妃見興宗傳

宣宗即位尊母皇后張氏為皇太后英宗即位尊為太
皇太后正統七年十月崩上尊諡曰誠孝恭肅明德弘
仁順天啟聖昭皇后

明史后妃傳曰宣宗崩英宗方九歲宮中訛言將
召立襄王矣太后趣召諸大臣至乾清宮指太子
泣曰此新天子也浮言乃息大臣請垂簾太后曰
母壞祖宗法第悉罷一切不急務時勗帝向學

委任股肱故終太后世王振不敢專大政

英宗即位尊母皇后孫氏為皇太后景帝時尊為上聖
皇太后英宗復辟上徽號曰聖烈慈壽天順六年九月
崩上尊謚曰孝恭懿憲慈仁莊烈齊天配聖章皇后

后妃傳曰英宗在迤北太后數寄禦寒衣裘及還
南內數入省視石亨等謀奪門先密白太后許之
景帝即位尊母賢妃吳氏為皇太后英宗復辟復稱宣
廟賢妃成化中薨

憲宗即位尊母皇后錢氏為慈懿皇太后成化四年六月崩上尊諡曰孝莊獻穆弘惠顯仁恭天欽聖睿皇后錢皇后無子憲宗立上兩宮徽號下廷臣議太監夏時希貴妃意欲獨尊周貴妃為太后大學士李賢彭時持不可中官傳貴妃旨豈有無子而稱太后者宣德間有故事彭時曰宣德胡后上表讓位故正統初不加尊今日事異安得為比賢亦極言之議遂定彭時以兩宮同稱則無別錢皇后請加二字以便稱謂

從之越數日中官覃包至內閣曰帝意固如是但迫於太后不敢自主非二公力爭幾誤大事

又尊生母貴妃周氏為皇太后成化二十三年四月上徽號曰聖慈仁壽孝宗即位尊為太皇太后弘治十七年三月崩上尊謚曰孝肅貞順康懿光烈輔天承聖睿皇后

孝宗即位尊母皇后王氏為皇太后至武宗即位尊為太皇太后正德五年上尊號曰慈聖康壽十三年崩上

尊諡曰孝貞莊懿恭靖仁慈欽天輔聖純皇后

臣等謹按憲宗后胡氏以杖萬貴妃而廢後孝宗生於西宮后保抱惟謹及即位念后恩命服膳皆如母后禮此亦以皇太后之禮事之者也但未復尊號故不載

武宗即位尊母皇后張氏為皇太后正德五年上尊號曰慈壽世宗入繼稱聖母加上尊號曰昭聖嘉靖三年加上康惠已改稱皇伯母十五年復加恭安二十年崩

諡曰孝康靖肅莊慈哲懿翊天贊聖敬皇后

臣等謹按皇伯母之稱由於張璉繼統不繼嗣之說當時議禮之大案千載而下自有公評至張后有定策迎立之功而世宗事之日薄興國太后誕節特勅朝賀燕賚而后誕免賀諸臣爭者皆得罪其後推怨張氏坐太后弟延齡謀逆論死太后赦襦席藁以請亦不見聽延齡之罪終無確証即以待皇伯母之恩誼律之亦有愧多矣

欽定四庫全書

御定四庫全書
卷二百

十六

世宗即位尊祖母邵氏

憲宗妃
睿宗母

為皇太后嘉靖元年上

尊號曰壽安十一月崩謚曰孝惠康肅溫仁懿順協天

祐聖皇太后七年改稱太皇太后十五年改稱皇后

又尊生母蔣氏

睿宗妃

為興國太后后大興人父為玉田

伯敷嘉靖三年上尊號曰本生章聖皇太后是年秋用

張璁等言去本生號尊為聖母七年上尊號曰慈仁十

五年加上康靖貞壽十七年崩上尊謚曰慈孝貞順仁

敬誠一安天誕聖獻皇后

初議追尊禮禮臣咸謂宜考孝宗而稱興王為皇叔
父妃為皇叔母不允進士張璉以繼統不繼嗣之說
進命廷臣集議楊廷和等抗疏力爭皆不聽會妃至
通州聞考孝宗惠曰安得以吾子為他人子留不進
帝涕泣願避位羣臣以慈壽太后命改稱興獻后元
年改稱興國太后三年乃上尊號稱本生皇太后尋
用張璉等言定稱孝宗為皇伯考昭聖太后為皇伯
母獻皇帝為皇考章聖皇太后為聖母至九年明倫

大典成頒示天下

神宗即位尊母皇后陳氏為仁聖皇太后萬曆六年加
上徽號曰貞懿十年再加康靜二十四年崩謚曰孝安
貞懿恭純溫惠佐天弘聖皇后

又尊生母貴妃李氏為慈聖皇太后萬曆六年加上徽
號曰宣文十年再加明肅二十九年加貞壽端獻三十
四年加恭熹四十三年崩上尊謚曰孝定貞純欽仁端
肅弼天祚聖皇太后

舊制天子立尊皇后為皇太后若有生母稱太后
者則加徽號以別之是時太監馮保欲媚貴妃因
以並尊諷大學士張居正居正不能違也

欽定續文獻通考卷二百

欽定四庫全書

欽定續文獻通考卷二百一

帝系考

后妃

宋理宗皇后謝氏諱道清天台人寶慶三年冊為后

餘見

皇太后門

度宗皇后全氏會稽人咸淳三年冊為后

餘見皇太后門

淑妃楊氏端宗之生母咸淳三年冊封

餘見皇太后門

臣等謹按馬端臨考載至寧宗后韓氏妃楊氏而

止

楊氏今詳見皇太后門

今考宋史后妃傳寧宗有曹美人

理宗有賈貴妃

生周漢國公主

閻貴妃度宗有帝昺之母

俞脩容史皆無傳不可詳考

遼太祖淳欽皇后蕭氏

本為舒嚕氏

諱平小字鄂爾多其先

回鶻人後為契丹右大部人后父曰淵神冊元年冊號

應天大明地皇后太祖崩稱制攝軍國事

餘詳見皇太后門

契丹國志曰太祖之崩后屢欲與身殉諸子泣后

惟截其右腕置柩中朝野號為斷腕太后

遼史后妃傳曰遼因突厥稱皇后曰哈屯國語謂之多爾吉尊稱曰納額默蓋以配后土而母之云后族唯伊蘇濟勒巴哩氏而世任其國事太祖慕漢高皇帝故耶律儼稱劉氏以伊蘇濟勒巴哩比蕭相國遂為蕭氏

外戚表曰契丹外戚其先曰二舒斂氏曰巴哩曰伊蘇濟勒至太祖娶舒嚕氏舒嚕本回鶻諾蘇之

後大同元年以外戚小漢為汴州節度使賜姓曰

蕭翰以從中國之俗

國語解曰又有以漢字書曰蕭以契丹字書曰舒穆魯

由是巴哩伊蘇濟勒舒魯三族皆為蕭姓巴哩二

房曰大父少父伊蘇濟勒亦二房曰大翁小翁世

宗以國舅塔喇噶為國舅別部聖宗合巴哩伊蘇

濟勒二國舅帳為一與別部為二

臣等謹按遼史后妃傳肅祖后謚昭烈懿祖后謚

莊敬元祖后謚簡獻德祖后謚宣簡皆蕭氏宣簡

后見皇太后門補懿元德四祖帝號歷年內所不載不應獨於后妃直從其最初而書之也故斷自

太祖后始

太宗靖安皇后蕭氏小字溫淳欽皇后弟舒贈之女初

納為妃生穆宗太宗即位立為皇后天顯十年崩

太宗本紀

云皇后崩於行在時太宗自將南伐

謚彰德重熙中更謚靖安

王圻續通考曰按太宗天顯八年七月行納后禮

此時靖安后猶在不知所納何人將紀載有誤也

按契丹國志曰后涿州人為遼興節度使蕭延思之女太宗崩於鎮城后時在國後崩與帝合葬所載與正史殊異惟生穆宗同則又非別是一后也

附錄備考

世宗懷節皇后蕭氏小字蘇克濟淳欽皇后弟阿固齊之女帝為永康王時納之生景宗天祿四年立為皇后五年察克作亂弑太后及帝后乘步輦直詣察克請畢收殮明日遇害謚曰孝烈重熙中更謚懷節

妃甄氏後唐宮人世宗從太宗南征得之即位後立為
皇后察克作亂遇害

臣等謹按甄氏曾為皇后傳文書之矣考世宗本
紀天祿四年冊皇后蕭氏明年九月即遇弑無冊
甄氏為后之文疑皇后二字當為某妃字之訛又

考契丹國志世宗朝止載甄皇后一人甄后生六

子長曰明紀

史作明辰

後為景帝世宗既登位冊為皇

后則又似甄氏實嘗為后矣考正史景宗乃懷節

皇后所生非甄氏所生皇子表甄氏生一子扎穆
字呼喇濟非景宗與志大異今附錄之以備考

穆宗皇后蕭氏內供奉翰林承旨知璫之女帝居藩納
為妃後正位中宮

景宗睿知皇后蕭氏諱綽小字燕燕北府宰相思溫之
女初選為貴妃尋冊為皇后生聖宗

餘詳皇
太后門

契丹國志曰景宗后燕燕侍中守尚書蕭守真之

女

志言以后父封魏王續
綱目又以守真為守興

或云北宰相思溫之女

按聖宗紀統和四年六月皇太妃諸王公主迎上
嶺表九月皇太妃以上納后進衣服馳馬以助會

親十二年詔皇太妃領西北路烏爾古等部兵

據蕭

達林傳因夏人梗邊故討之

十五年皇太妃獻西邊捷二十四

年幽皇太妃呼紐於懷州二十五年賜死幽所皇

太妃據名而論當是景宗之妃也后妃傳不載故

其姓氏事蹟莫得而詳焉又聖宗紀統和元年趙

妃進助山陵費趙妃亦無可考

聖宗仁德皇后蕭氏小字菩薩格睿知皇后弟烏延之女幼選入掖庭統和十九年冊為齊天皇后生二子皆早卒開泰五年宮人訥木錦生興宗后養為子聖宗崩納木錦自立為皇太后遷后上京尋誣以罪弑之

后妃傳曰后養興宗如已出納木錦以興宗侍之謹不悅聖宗崩護衛馮嘉努吉遜等希旨誣告北府宰相蕭珠卜國舅蕭必塔謀逆詔令鞠治連及后興宗聞之曰皇后侍先帝四十年撫育渺躬當

為太后今不果反罪之可乎訥木錦不從遷於上京車駕春蒐訥木錦慮帝懷鞠育思遣人加害

元妃蕭氏小字訥木錦淳欽皇后弟阿固齊五世孫生

興宗

餘詳皇太后門

契丹國志曰后父托果追封陳王

與史異

臣等謹按后妃傳止載聖宗仁德欽哀二后欽哀於興宗即位時由元妃尊為皇太后當聖宗時並未冊為后也聖宗紀統和四年九月納皇后蕭氏

十九年三月皇后蕭氏以罪降為貴妃

公主表於聖宗女有

云昔妃生者不言何氏豈即此耶

五月冊蕭氏為齊天皇后是齊

天之前以罪降妃者別是一后而傳中無有不

可考又聖宗紀開泰三年正月以馬氏為麗儀耿

氏淑儀尚寢白氏昭儀尚服李氏順儀尚功艾氏

芳儀孫氏和儀則宮中女官之制極為詳備馬氏

白氏李氏艾氏皆生女見公主表亦不可得而詳

考矣

興宗仁懿皇后蕭氏小字塔拉欽哀皇后弟大丞相孝

穆之長女

契丹國志曰應州人

帝即位入宮生道宗重熙四年立

為后二十三年號貞懿慈和文惠孝敬廣愛崇聖皇后

餘詳皇

太后門

貴妃蕭氏小字緞察駙馬都尉必魯之女興宗即位立
為皇后重熙初以罪降為貴妃

臣等謹按聖宗紀太平八年十一月諸族備會親
帳十二月皇太子納妃蕭氏當即貴妃也興宗紀

景福元年七月謁神主帳時阿爾威蕭氏始入宮
亦命拜之當是仁懿后也據傳文應是初立繼察
為后重熙初降貶乃於重熙四年更立仁懿為后
耳然本紀於重熙三年以前亦不載立后事

道宗宣懿皇后蕭氏小字觀音欽哀皇后弟樞密使惠
之女重熙中納為妃帝即位冊為皇后清寧二年十一
月上尊號曰懿德皇后生太子濬太康元年十一月被
誣賜死天祚帝乾統初追謚宣懿

后妃傳曰后好音樂伶官趙惟一侍左右宮婢單
登教坊朱頂鶴誣后與惟一私詔耶律伊蘇與張
孝傑劾狀因而實之族誅惟一賜后自盡

契丹國志曰道宗后平州人贈同平章事蕭顯然

女生庫濟是為秦王名元吉道宗登位后正位宮

中魯王宗元之亂

即皇太叔重元清寧元年與其子尼嚕古謀叛

道宗與

同射獵

本紀是年七月如太子山

內外震恐未知音耗后勒兵

鎮帖中外甚有聲稱後崩

臣等謹按契丹國志所載后事與正史迥不相同
考道宗止一子即太子濬並無秦王元吉其人者
正史云天祚為太子濬子志云天祚為秦王元吉
子以一人而位號與名字之不同如是殊不可解
惠妃蕭氏小字塔斯駙馬都尉錫默之妹太康二年選
入掖庭冊為后八年降惠妃後貶為庶人幽於宜州天
祚帝天慶六年召還封太皇太妃後二年奔黑頂山卒
后妃傳曰妃因伊蘇譽之立為后居數歲未見皇

嗣后妹額特埒先嫁伊蘇子蘇頁后以宜子言於

帝離婚納宮中八年皇孫延禧封梁王

據本紀是六年降

為妃

本紀亦在八年

徙乾陵額特埒還其家頃之其母燕

國夫人厭魅梁王伏誅貶庶人

臣等謹按道宗紀太康二年六月冊皇后蕭氏封

其父祗侯郎君必埒哩為趙王叔西北路招討使

額哩頁遼西郡王漢人行宮都部署駙馬都尉錫

默柳城郡王則后為錫默姪女傳作妹所載不同

又按后妃傳似降妃不久即有厭魅事而貶庶人也考大安二年書惠妃母燕國夫人錫庫以厭魅事覺伏誅是年距太康八年已四年矣終道宗世本紀無貶為庶人之文直至天祚帝紀乾統二年始書降惠妃為庶人紀傳孰是孰非無由訂正矣天祚帝皇后蕭氏小字圖魯拉大安三年入宮尋封燕國王妃乾統初冊為皇后女直亂從天祚西狩以疾崩臣等謹按契丹國志曰濱海王后蕭氏平州人節

度使蕭和拉之女山金司之禍后并被擒納罕納
為次室其後耶律伊都雲中兵起烏克紳誅伊都
并及於后所言與正史異

德妃蕭氏小字錫衮壽隆二年入宮封燕國王妃生子
塔魯乾統三年改德妃以柴冊禮封塔魯為燕國王加
妃號贊翼王薨以哀戚卒

文妃蕭氏小字色色國舅大父房之女

契丹國志作
渤海大氏人

乾

統三年立為文妃生晉王額魯溫以柴冊加號承翼保

大元年誣以謀立皇子晉王事賜死

元妃蕭氏小字貴格燕國妃之妹冊為元妃從天祚西狩以疾終

臣等謹按天祚帝長子趙王母趙昭容史無傳不可考

又按義宗順宗之妃皆追尊為皇后順宗妃蕭氏於天祚帝乾統初追尊為貞順皇后義宗端順后已附見皇太后門

后妃傳論曰遼以鞍馬為家后妃往往長於射御

軍旅田獵未嘗不從如應天之奮擊室韋

太祖嘗渡磧擊

黨項黃頭臭泊二室韋乘虛襲之后知勒兵以待大破之

承天之御戎澶淵

聖宗

時澶淵之役承天太皇后親御戎車指麾三軍賞罰信明將士用命仁懿之親破重

元道宗時太叔重元與其子尼嚕古謀反太后親督衛士擒之

古所未有亦其

俗也靖安無毀無譽齊天巧思乃奢侈之漸

嘗以草建

為殿式密付有司令造清風天祥八方三殿既成益寵異所乘車置龍首鷓尾飾以黃金又造九龍

輅諸子車以白金為浮圖各有巧思

宣懿度曲知音豈致誣讟之階

乎文妃能歌詩諷諫而謂謀私其子非矣若簡憲

之艱危保孤

元祖為朗德所害后嫠居恐不免命四子往依隣家乃獲安太祖生后以

骨相異常懼有陰懷節之從容就義雖烈丈夫何圖害者鞠之別帳

以過之欽哀狠桀賊殺嫡后而興宗不能防閑其

母惜哉

臣等謹按遼代后妃凡有傳者皆已載入考皇子表太祖四子宮人蕭氏生其二太宗五子宮人蕭氏生其三聖宗六子布威氏生其二姜氏生其一

公主表景宗女有渤海妃生者聖宗女有止言貴
妃生者不言何氏又有云蕭氏生二女蕭氏為國
舅伊勒希巴房之女不言封號又有白氏李氏艾
氏皆生女當即開泰二年封昭儀順儀芳儀者也
又景宗本紀保寧三年四月世宗妃卓琳及普格
以厭魅賜死以上諸妃皆無傳不可考故類誌於
此使不全泯沒云

又按契丹國志止載太祖舒嚕皇后太宗蕭皇后

世宗甄皇后穆宗蕭皇后景宗蕭皇后聖宗蕭皇后興宗蕭皇后道宗蕭皇后瀋海王蕭皇后文妃共十人較正史少其半與正史相參多有異同雖纂述自當以正史為據然綱目所載遼諸帝事往往採葉氏書為多則其書未可盡廢也今一以正史為主而附載其同異以俟參檢焉

金太祖聖穆皇后唐古氏熙宗天會十三年追謚

金史后妃傳曰金代后不娶庶族甥舅之家有周

姬齊姜之義國初諸妃皆無位號熙宗始有貴妃
賢妃德妃之號海陵淫嬖後宮寢多大定後宮簡
少明昌以後大備內官制度諸妃視正一品比三
夫人昭儀昭容昭媛修儀修容修媛充儀充容充
媛視正二品比九嬪嬙嬖九人視正三品美人九
人視正四品才人九人視正五品比二十七世婦
寶林二十七人視正六品御女二十七人視正七
品采女二十七人視正八品比八十一御妻又有

尚宮尚儀尚服尚食尚寢尚功皆內官也

光懿皇后費摩氏熙宗天會十三年追謚

欽憲皇后赫舍哩氏

餘見太皇太后門

宣獻皇后布薩氏睿宗母也熙宗天會十三年追冊德

妃世宗大定元年追謚

崇妃蕭氏熙宗時封貴妃海陵天德二年正月封元妃

是月尊封太妃誣以隱惡殺之世宗大定十九年追封

崇妃

后妃傳曰海陵母大氏事蕭氏甚謹海陵篡立尊
大氏為皇太后每有宴集太妃坐上坐大氏執婦
禮海陵積不能平及殺宗義等誣太妃以隱惡殺
之并殺所生子任王威赫大定十九年欲復太妃
舊號下禮官議言前代稱太妃者皆以子貴古者
入稱后繫夫在朝稱太繫子與今蕭妃事不同恐
不得稱太止當追封妃號從之

臣等謹按崇妃蕭氏傳云熙宗時封貴妃考熙宗

紀不載追封宗妃世宗紀文亦不載皆作史者畧之耳

又按金始祖明懿皇后

完顏部人年六十餘始嫁世祖

德帝

思皇后安帝節皇后獻祖恭靖皇后昭祖威順皇

后圖克坦氏景祖昭肅皇后唐古氏世祖簡翼皇

后納喇氏肅宗宣靖皇后富察氏穆宗貞惠皇后

烏庫哩氏康宗敬僖皇后唐古氏史皆有傳今准

遼代例斷自太祖時始

太宗欽仁皇后唐古氏

餘見皇太后門

熙宗悼平皇后費摩氏初封貴妃天眷元年立為皇后
皇統元年冊為慈明恭孝順德皇后九年殺之海陵篡
立追謚為悼皇后大定間加謚悼平

后妃傳曰后干預政事熙宗內不能平久之積怒
遂殺后而納胙王常勝妃薩蔑入宮繼又殺德妃
烏庫哩氏妃瓜爾佳氏張氏費摩氏熙宗遇弒海
陵欲收人心以后死無罪故追謚之

廢帝海陵后圖克坦氏初為岐國妃天德二年封惠妃

金史紀事本末 卷一百一
尋立為皇后海陵遇害歸父母家大定十年卒

后妃傳曰正隆六年海陵幸南京備法駕與后及
太子光英共載而入海陵伐宋后與光英居守海
陵遇害圖們額哩頁殺光英於汴后至中都居於
海陵母大氏故宮頃之世宗憐其無依詔歸父母
家於上京歲賜錢二千貫奴婢皆給官廩

元妃大氏初封貴妃進惠妃貞元二年進妹妃正隆二
年進元妃

宸妃蕭氏初封昭容天德二年封淑妃貞元二年進宸妃

麗妃耶律氏初封修容天德四年進昭媛貞元元年進昭儀三年進麗妃

后妃傳曰海陵即位之初後宮止此三人尊卑之叙等威之辨若有可觀者及其侈心既萌淫肆蠱惑不可復振後宮諸妃十二位又有昭儀至充媛九位嬈好美人才人三位殿直最下其他不可舉

數

臣等謹按海陵諸嬖如昭妃富察氏等后妃傳中詳載之今亦約載於左其不與諸代后妃同列者以淫寵溺惑皆多中冓之言固不得與正名定位之人連類而並觀也

昭妃阿里庫姓富察氏初嫁宗盤子阿固岱阿固岱誅再嫁宗室囊嘉特囊嘉特死及海陵篡位以昏禮納之封賢妃再封昭妃後縊殺之

貴妃定格姓唐古氏崇義節度使烏達之妻海陵
令定格縊殺烏達而納之貞元二年封貴妃後以
取所私家奴閹乞兒入宮縊死

麗妃實格者定格之妹秘書監文之妻海陵納之
封修容貞元三年進昭儀正隆元年進柔妃二年
進麗妃

柔妃密呼姓耶律氏天德二年使禮部侍郎蕭拱
取之於汴初封充媛後封柔妃

昭妃阿蘭海陵叔曹國王宗敏妻也殺宗敏而納之封昭妃後令出宮

修儀高氏秉德弟嘉哩妻也海陵殺諸宗室釋其婦女宗本子薩爾拉妻宗固子呼喇勒妻和色哩妻及嘉哩妻皆納之未幾高氏封修儀後遣還父母家

昭媛扎巴姓耶律氏嘗許嫁奚人蕭唐古特海陵納之封昭媛後以事誅

臣等謹按以上所述雖皆淫嬖然猶實有封號其
他宗室戚屬肆意淫亂史中已詳載之茲不縷述
世宗昭德皇后烏凌阿氏世宗在濟南海陵召后来中
都行至良鄉自殺大定二年追冊昭德皇后章宗時改
謚明德

后妃傳曰海陵召后時后念若身死濟南海陵必
殺世宗惟奉詔去濟南而死世宗可以免謂世宗
曰我當自勉不可累大王也行至良鄉從者防之

稍緩后得間即自殺

元妃張氏世宗納為次室早卒大定二年追封宸妃進
惠妃十九年進元妃

元妃李氏南陽郡李石女大定元年封賢妃二年進貴
妃七年進元妃世宗感念昭德皇后不復立后元妃下
皇后一等在諸妃上大定二十一年薨衛紹王即位追
謚光獻皇后貞祐三年削皇后號

臣等謹按后妃傳元妃陪葬昭德皇后坤厚陵所

與俱者尚有賢妃舒穆魯氏德妃圖克坦氏柔妃
大氏又豫王允成之母早卒上命為元妃養子豫
王之母則昭儀梁氏也史皆無傳不可考

章宗欽懷皇后富察氏上京路和碩河人大定二十三
年章宗為金源郡王備禮納之後進封妃帝即位遂加
追冊

元妃李氏實勒其家微賤以監戶女子入宮明昌四年
封昭容明年進淑妃後進元妃章宗崩衛紹王即位以

事賜自盡

后妃傳曰自欽懷皇后沒中宮虛位久章宗欲立李氏而國朝故事皆圖克坦唐古富察納喇布薩赫舍哩烏凌阿烏庫哩諸部長之家世為婚姻李氏微甚大臣固執不從僅封元妃泰和二年生皇子德里二歲而薨大定八年承御賈氏及范氏皆有娠章宗崩元妃召平章政事完顏匡定策遺詔立王叔衛紹王即位俟內人有娠者二人生男立

為儲貳大安元年二月詔言賈氏乳期已過范氏
胎形已失賈氏有娠本由李氏詐謀乃賜李氏賈
氏自盡

衛紹王后圖克坦氏大安元年立為皇后至寧元年呼
沙呼亂與衛王俱遷於衛邸宣宗即位削皇后號貞祐
二年徙衛紹王家人於鄭州

宣宗皇后王氏中都人明惠皇后妹也宣宗封翼王章
宗詔諸王求民家子以廣繼嗣后與龐氏偕入王邸又

納后姊貞祐元年封后元妃后無子姊淑妃生哀宗養

以為子二年賜姓溫都氏立為后

餘見皇太后門

明惠皇后王皇后之姊也生哀宗初封淑妃及妹立為

后進元妃

餘見皇太后門

后妃傳曰或曰宣宗為諸王時莊獻太子母為正

妃及即位尊為皇后貞祐元年九月詔曰元妃某

氏久奉侍於潛藩已賜封於國號可立為皇后其

名氏蓋不可考也或又曰自王氏姊妹入宮而后

寵哀尋為尼王氏遂立為后皆明惠之謀也

臣等謹按宣宗紀貞祐元年九月無立后之詔至二年七月詔立元妃溫都氏為皇后此后妃傳所云貞祐元年九月詔以元妃某氏為皇后固傳疑之辭也又考莊獻太子傳其母未詳元齡傳云或曰莊獻同母弟或曰麗妃史氏所生又傳載麗氏與王皇后偕入邸後麗氏為真妃生荆王守純又哀宗遣圖克坦肆喜迎兩宮時柔妃費摩氏等乘

馬出宮史氏龐氏費摩氏皆無傳不可深考又
載寶符李氏從至宣德州居摩訶院將北行於佛
像前縊死柔妃費摩氏寶符李氏不知為宣宗之
妃哀宗之妃

哀宗皇后圖克坦氏正大元年立為皇后哀宗遷歸德
遣后弟肆喜詣汴奉迎夜至陳留不敢進復歸於汴城
破北遷不知所終

臣等謹按景宣皇帝睿宗顯宗之妃皆追尊為皇

后景宣帝妃富察氏熙宗即位追尊為惠昭皇后
睿宗妃富察氏太宗之妹之女也世宗即位追尊
為欽慈皇后又妃李氏世宗生母也世宗即位追
尊貞懿皇后顯宗妃二人章宗母圖克坦氏已載
皇太后門宣宗生母劉氏遼陽人宣宗即位追尊
為昭聖皇后其遼王宗幹之妃已詳皇太后門

元太祖光獻翼聖皇后名布爾特格勒津鴻吉哩氏托

音色辰女

后妃表作字兒
台旭真太皇后

世祖至元二年追謚光獻武

宗至大二年加謚翼聖

續弘簡錄曰太祖在沙漠時有哈喇齊繖扎爾都

爾本塔塔爾伊奇喇斯鴻吉哩等部將合謀不利

於太祖太祖起兵盡誅之惟鴻吉哩入降賜名色

辰

本名托音因從太祖起兵有功賜名色辰故兼稱之

其子阿禪從太祖征

伐有功賜號諾延

元史后妃傳云賜號國舅封王爵以統其部族

約曰生

女世為后生男世尚公主

托音色辰傳曰每歲四時孟月聽讀所賜旨世

世不絕以故諸后多出其族

臣等謹按后妃傳於光獻翼聖之謚皆云世祖二年十二月所上備載冊文而弘簡錄則曰據武宗紀有至大二年追謚光獻皇后之文又有上莊聖皇后尊謚冊文體例正同且至元初百事草創未聞有製冊之禮故依武宗紀而正之今考世祖至元二年十二月紀並無上謚之事武宗至大二年本紀則大書之且元史后妃表固云至元二年追謚光獻至大二年加謚翼聖則傳文之訛甚明邵

氏之言得其實矣

和拉袞皇后果勒濟雅坦皇后托果斯皇后特默倫皇
后額琳沁巴勒皇后巴延呼圖克皇后呼實罕妃子

右大鄂爾多

呼蘭皇后哈勒巴津皇后伊實琳沁皇后托歡徹爾皇
后伊津妃子伊埒呼圖克妃子徹辰妃子哈喇沁妃子
右第二鄂爾多

伊蘇皇后和拉哈喇皇后阿齊蘭皇后圖勒古爾皇后

徹爾皇后阿實克默色皇后鄂勒哲呼圖克皇后呼嚕
古岱妃子呼嚕古爾妃子拉拜妃子

右第三鄂爾多

伊蘇肯皇后琿塔噶皇后哈達皇后鄂勒哲和斯皇后
雅爾皇后托歡妃子鄂勒哲妃子金蓮妃子鄂勒哲台
妃子納蘭妃子瑪爾沁妃子索隆噶妃子

右第四鄂爾多

巴拜岱妃子

見歲賜錄不知所守鄂爾多

臣等謹按傳云后妃有四鄂爾多四十餘人不記
氏族其名悉見於表今表中所列止三十九人豈
尚有闕佚耶又考金史本紀宣宗貞祐二年奉衛
紹王公主歸於大元太祖皇帝是為公主皇后不
知是元史表中何后也

元史后妃表曰元初因其國俗不娶庶姓非此族
也不居嫡選蓋有姬姜之遺意固可嘉也然其居

則有曰鄂爾多之分沒復有繼承守宮之法位號之清名分之瀆則亦甚矣

臣等謹按太祖之母名諤楞不詳其氏世宗時追上尊謚曰宣懿皇后不知卒於何時今據元史后妃傳表斷自太祖時始

太宗正宮巴喇噶沁皇后

弘簡錄無沁字

昭慈皇后托里格訥爾瑪錦氏

號六皇后

至元二年崩追謚

昭慈

臣等謹按后妃傳六皇后崩於世祖至元二年追謚昭慈考世祖本紀后妃表皆不言六皇后崩年夫果至元二年則書法不當云追謚疑傳文或有誤耳

昂輝二皇后克勒奇庫塔納三皇后塔納奇納六皇后額爾吉訥妃子

臣等謹按憲宗紀曰太宗在潛邸養憲宗為子屬昂輝皇后撫育之即二皇后也憲宗二年紀文云

遷太宗皇后克勒奇庫塔納於庫騰所居地之西
即三皇后也但烏瑪錦氏既號六皇后何以塔納
奇納又稱六皇后哉不可得而考矣表言額爾吉
訥妃子係默埒之母

定宗欽淑皇后名烏拉海額實

后妃表止載此
后為三皇后

定宗崩

后以太宗嘗有旨以皇孫實勒們為嗣抱之垂簾聽政
者六月諸王大臣皆不服議立憲宗憲宗二年后及實
勒們母以厭禳事覺並賜死至元二年追謚欽淑

臣等謹按實勒們為太宗第三子庫春之子太宗嘗撫之宮中稱太孫遺命嗣立者也太宗后立定宗故實勒們不立

憲宗呼爾察皇后果囉羅部人

貞節皇后名呼圖克台鴻吉哩氏阿禪之從孫孟克沁

之女

表作阿禪
從孫女

早崩至元二年追謚貞節

約索爾皇后貞節后之妹也出卑三皇后歲己未

憲宗九年

從憲宗南伐七月憲宗崩九月后亦薨於六盤莽賚呼

圖克皇后泰定三年詔守巴圖爾營帳

臣等謹按莽賚呼圖克皇后弘簡錄亦載之考憲宗長子為巴圖爾大王所云詔守巴圖爾營帳其即此乎但自憲宗時至泰定帝三年已幾七十年矣考泰定帝紀亦無此文疑后妃表所載或誤今據書之以俟考

世祖大皇后名特古掄鴻吉哩氏濟寧忠武王阿禪裔孫托里女

右大鄂爾多

徹伯爾皇后鴻吉哩氏濟寧忠武王阿禪諾延女中統

初立為皇后至元十年授冊寶十八年崩

本傳作十四年今以世祖

紀及后妃表改正

成宗即位上尊謚曰昭睿順聖

臣等謹按后妃傳表皆載徹伯爾后授冊寶後尋

上尊號曰貞懿昭聖順天睿文光應皇后弘簡錄

亦載之而存其疑曰世祖至元二十一年始受尊

號而后以十八年崩恐無先受尊號之理今考傳

表所載尊號乃至元十二年羣臣欲上而帝不許者定屬誤載

又按后妃傳云徹伯爾后濟寧忠武王阿禪之女表則云魯忠武王阿禪諾延女考托音色辰之子阿禪賜號諾延又考成宗紀元貞元年追封皇國舅阿禪諾延為濟寧王謚忠武封駙馬曼濟台為濟寧王後進封魯王則阿禪當亦追進魯王以此考之徹伯爾一后傳與表究相符合矣特古掄后

傳不載表載之不云何氏何人之女惟弘簡錄則云亦鴻吉哩氏濟寧王阿禪孫托里之女考特色辰傳所載同故從之第徹伯爾為阿禪女而特古掄諾爾布又為托里仙童女何輩行相遠若此是亦可疑耳

諾爾布皇后鴻吉哩氏納沁孫仙童之女至元二十年納為皇后繼守正宮

右與徹伯爾后皆第二鄂爾多

塔喇海皇后諾木歡皇后

右第三鄂爾多

巴延烏珍皇后庫庫楞皇后

右第四鄂爾多

巴拜哈斯妃子

見歲賜錄不知所守鄂爾多

蘇喀達實皇后

泰定三年詔守

世祖鄂爾多薩巴罕妃子

成宗布爾罕皇后巴約特氏駙馬托里和斯之女貞元

初立為皇后大德三年授冊寶大德十年后謀貶順宗

妃塔濟與其子仁宗往懷州明年成宗崩后謀立安西

王阿南達實哩

亦作阿南達無實哩二字

仁宗自懷州入清宮禁誅

安西王并搆后以私通事出居東安州賜死實哩達喇

元妃鴻吉哩氏額埒春女生子德壽早薨武宗至大三

年追謚貞慈靜懿皇后

臣等謹按后妃傳於實哩達喇亦云大德三年十

月立為后

弘簡錄亦載之表不載

考武宗至大三年十月冊

文尚稱惟先元妃鴻吉哩氏中云雖小星之逮下

豈衆曜之敢齊用是究成先志式闡徽稱則其當
成宗時位止元妃無疑也表云配享成廟蓋巴約
特氏既廢成廟遂無配后故追尊元妃以配之今
據年表及冊文以正后妃傳及弘簡錄之訛焉

克勒奇庫塔納皇后

武宗宣慈惠聖皇后名珍格鴻吉哩氏托里子班巴爾
之女至大三年冊為后泰定四年崩謚曰宣慈惠聖
蘇喀實哩皇后鴻吉哩氏阿禪從孫哈爾吉之女珍格

皇后之從妹也又有鄂勒哲岱皇后

妃伊奇哩氏世宗子安西王莽噶拉之女所出

傳作紐倫公主

之女公主即莽噶拉女

生明宗天歷二年追謚仁獻章聖皇后至

正六年改謚莊獻嗣聖唐古氏生文宗天歷二年追謚

文獻昭聖皇后

仁宗莊懿慈聖皇后名阿南達實哩鴻吉哩氏生英宗皇

慶二年三月冊為皇后

崩言未詳說見前皇太后門

謚曰莊懿慈聖

臣等謹按凡鴻吉哩氏之為后者皆依世次詳載

托音色辰傳中獨此後不載

達爾瑪實哩皇后

英宗莊靜懿聖皇后

靜表作靖

名蘇喀巴拉伊奇哩氏昌國

公主伊勒噶雅女至治元年冊為后泰定四年崩謚曰

莊靜懿聖

雅本呼圖克皇后多爾濟巴勒皇后

泰定帝巴拜哈斯皇后鴻吉哩氏阿禪孫鄂蘭徹爾之

女

表作邁珠罕之女

泰定元年冊為后文宗天歷初徙居樂安

州呼喇皇后伊蘇皇后布延庫哩頁額寶皇后寶喇特
穆爾皇后塔納皇后又有額琳沁巴拉皇后昌國公主
伊勒噶雅女也又有薩都巴拉皇后

弘簡錄
作妃

帝子壽寧

公主女也泰定三年六月納於中宮早卒

妃二人一曰巴罕一曰蘇喀達喇

表皆作
皇后

皆鴻吉哩氏

托里孫充王邁珠罕之女文宗天歷初俱安置東安州

臣等謹按巴拜哈斯為阿禪孫鄂蘭徹爾之女巴

罕蘇喀達喇為邁珠罕之女后妃傳與托音色辰

傳所載相同弘簡錄亦同惟后妃表以巴拜哈斯亦為
邁珠罕之女且以巴罕為巴拜哈斯之妹蘇喀達喇為
巴罕之妹與傳互異今姑從后妃傳托音色辰傳載之
又按雅克持穆爾傳有取泰定后為夫人事未詳
所取為何后

明宗班布爾實皇后

寧宗紀帝母曰
皇后萬瑪錦氏

成宗甥壽寧公主

之女也

按當與泰定所納
薩都巴拉為姊妹

侍明宗潛邸生寧宗至順元

年四月文宗后布達實哩與宦者拜珠謀弒后后暴崩

貞裕徽聖皇后名瑪勒岱哈喇魯特氏郡王阿爾斯蘭之裔明宗北狩過其部納馬生順帝

后妃傳云生順帝而崩

順帝

至元二年追尊為貞裕徽聖皇后

臣等謹按此后妃傳之文哈喇魯特氏實生順帝與庚申帝記所載回回女子者迥異是豈可曲信草野訛傳而反蔑正史耶其追尊在至元二年而后妃傳則云文宗立即上謚冊以理揆之當是上明宗謚冊時已及后妃而順帝正位後復追尊所

自出以昭示天下故紀傳兩存之也

溫綽歡皇后伊埒實克皇后布延呼圖克皇后伊蘇皇后托果斯皇后

臣等謹按元代后妃所守某鄂爾多多稱皇后考文宗本紀至順元年十月勅累朝宮分官署凡移文無得稱皇后止稱某位下娘子其委用官屬並用中書擬聞始得定其稱謂云

文宗皇后布達實哩鴻吉哩氏駙馬魯王多阿克巴拉

女天歷元年立為后生子雅克特古斯

餘詳皇太后門

寧宗皇后塔哩雅圖默色鴻吉哩氏

不詳為何人女

至順三年

十月立為后

時寧宗已即位

至正二十八年崩

臣等謹按此乃據后妃傳書之也弘簡錄所載同

第后妃表與托音色辰傳皆不載考寧宗崩時年

七歲本紀無立后事順帝紀亦不載至正二十八

年后崩升祔寧宗廟事考至正二十八年順帝北

奔元亡當此危急之秋何暇行升祔之禮傳文所

載疑其失實但一帝必有一后故存之以俟再考

順帝喇特納實哩皇后欽察氏

紀作巴約特氏

太平王雅克特

穆爾女帝即位立為后元統二年授冊寶至元元年

后妃

傳作元統三年是年十一月始改至元元年后之被殺在七月故尚稱元統

丞相巴延奏后

兄騰吉斯弟塔喇海謀逆誅之遷后出宮巴延鵠殺后

於開平民舍

巴延呼圖克皇后鴻吉哩氏武宗珍格皇后姪毓德王

博囉特穆爾女至元三年立為后至正二十五年崩

鄂勒哲呼圖克皇后奇氏高麗人起家微初進為宮女生皇太子阿裕實哩達喇巴延呼圖克皇后崩立為后改賜索隆噶氏至正二十八年從帝北奔

臣等謹按順帝紀至正七年十二月隆福宮三皇后鴻吉哩氏薨史無傳不可考

又按睿宗顯宗之妃皆追尊為皇后睿宗妃繅勒噶塔納奇味氏生憲宗世祖相繼為帝至元二年追尊莊聖皇后至大二年加謚顯懿顯宗元妃名

布延庫哩頁額寶鴻吉哩氏生泰定帝泰定帝即位追尊宣懿淑聖皇后其裕宗順宗之后已詳皇太后門

又按元代后妃多鴻吉哩氏仁宗裕宗顯宗之后史傳不言為何人女餘諸后每從其自出者言之矣第托音色辰傳中世次已半不可考據后妃傳

叅校往往不符如托里為阿禪之孫

托音色辰傳曰有托里者

阿禪之裔孫也又曰世祖后特古掄阿禪孫托里之女孫字裔孫字亦不符武宗真格

后為托里子班巴爾女蘇喀實哩皇后為阿禪從

孫哈爾吉女而謂即真格之從妹

后妃傳表皆然

世次舛

矣且托里稱阿勒達爾圖為族父阿勒達爾圖即
特穆爾係阿禪之孫琳沁之子則托里當為阿禪
曾孫行以此班之真格與蘇喀實哩之輩行尤遠
也舉一以例其餘蓋皆不可得而深考矣

又按馬端臨考凡奉冊皇太后皇太后臨朝稱制
冊后妃皇太子皇子公主公主下嫁諸儀注皆分

載帝系考各門下今以此類禮儀無一非王禮也
故仍王圻續通考本槩列於王禮考而此不錄

明大祖孝慈高皇后馬氏宿州人父為徐王馬公后幼
時育於郭子興子興竒太祖以后歸焉洪武元年冊為
皇后十五年崩永樂元年加上尊謚曰孝慈昭憲至仁
文德承天順聖高皇后嘉靖十七年加上尊謚曰孝慈
貞化哲順仁徽成天育聖至德高皇后

成穆貴妃孫氏陳州人年十八太祖納之及即位冊封

貴妃位衆妃上洪武七年薨

淑妃李氏壽州人廣武衛指揮傑之女洪武十七年冊封淑妃攝六宮事未幾薨

寧妃郭氏濠人父為營國公山甫太祖微時山甫以相當極貴遣妃侍之後封寧妃李淑妃薨妃攝六宮事

臣等謹按諸王公主傳太祖有胡充妃達定妃郭惠妃胡順妃韓妃余妃楊妃周妃趙貴妃李賢妃劉惠妃葛麗妃高麗韓妃鄭安妃或生皇子或生

公主史皆無傳不可考其肅王模之母邵氏并無封號

惠帝皇后馬氏光祿少卿全之女洪武二十八年冊為皇太孫妃建文元年冊為皇后四年六月京城陷崩於火

成祖仁孝皇后徐氏中山王達長女洪武九年冊為燕王妃成祖即位冊為皇后永樂五年崩仁宗即位上尊謚曰仁孝慈懿誠明莊獻配天齊聖文皇后

昭獻貴妃王氏蘇州人永樂七年封貴妃十八年薨

恭獻賢妃權氏光祿卿永均女朝鮮所貢永樂七年封
賢妃八年薨

仁宗誠孝皇后張氏永城人彭城伯麒之女洪武十六
年封燕世子妃永樂二年封皇太子妃仁宗立冊為皇

后餘詳皇
太后門

臣等謹按諸王傳仁宗有李賢妃張順妃郭貴妃

史皆無傳不可考

宣宗恭讓皇后胡氏濟寧人永樂十五年選為皇太孫妃後為皇太子妃宣宗即位立為皇后宣德三年上表辭位至正統八年崩天順七年上尊謚曰恭讓誠順康穆靜慈章皇后

后妃傳曰后無子又善病而孫貴妃有寵宣宗令后上表辭位退居長安宮賜號靜慈仙師而冊貴妃為后諸大臣張輔蹇義等皆不能爭張太后憫后賢常召居清寧宮內廷朝宴命居孫后上至天

順六年孫太后崩錢皇后為英宗言后賢而無罪
因勸復其位號英宗問大學士李賢賢對曰陛下
此心天地鬼神實臨之然臣以陵寢享殿神主俱
宜如奉先殿式庶稱陛下明孝明年七月乃上尊
謚并修陵寢

孝恭皇后孫氏鄒平人安國公忠之女幼入宮成祖選
為皇太孫嫡宣宗即位封貴妃宣德三年胡后廢遂冊

為皇后

餘詳皇
太后門

后妃傳曰冊封故事惟皇后金寶金冊貴妃以下
有冊無寶孫妃有寵宣宗請於太后製金寶賜焉
貴妃有寶自此始妃亦無子陰取宮人子為己子
即英宗也英宗生母人卒無知之者

吳后景帝母也丹徒人彥名之女

彥名應亦贈
官史未詳

宣宗為

太子時選入宮宣德三年封賢妃

餘詳皇
太后門

惠妃郭氏名愛鳳陽人入宮為嬪二旬而卒正統元年
追贈皇庶母惠妃時又贈謚何氏為端靜貴妃趙氏為

純靜賢妃吳氏為貞順惠妃焦氏為莊靜淑妃曹氏為莊順敬妃徐氏為貞惠順妃袁氏為恭定麗妃諸氏為貞靜淑妃李氏為恭順充妃何氏為肅僖成妃皆宣宗殉葬宮妃也

后妃傳曰初太祖崩宮人多從死者建文永樂時相繼優恤若張鳳李衡趙福張璧汪賓諸家皆世襲千戶人謂之太祖朝天女戶成仁宣三朝亦用殉及景帝以郕王薨猶用其制蓋王府皆然至英

宗遺詔始罷之

英宗孝莊皇后錢氏海州人金吾右衛指揮使貴之女

正統七年立為后

餘詳皇太后門

貴妃周氏昌平人慶雲侯能之女天順元年封貴妃

餘詳

皇太后

后門

臣等謹按諸王公主傳英宗有楊安妃魏德妃萬

宸妃高淑妃韋德妃史皆無傳不可考其嘉祥公

主母劉氏並無封號

景帝廢后汪氏順天人錦衣指揮僉事瑛之女正統十年冊為郕王妃景帝即位冊為皇后景泰三年廢天順時仍稱郕王妃正德元年薨二年上尊謚曰貞惠安和景皇后

后妃傳曰后生二女無子景泰三年妃杭氏生子見濟景帝欲立為太子而廢憲宗后執不可以是忤帝意故廢景帝崩後英宗以其後宮唐氏等殉議及后李賢曰妃已幽廢況兩女幼尤可憫乃已

肅孝皇后杭氏錦衣衛指揮使昱之女初為妃景泰三年廢汪皇后冊妃為皇后七年崩英宗復辟削后號

臣等謹按弇州史料後集載英宗天順元年發都督唐興充軍以其女為郕王貴妃興受郕王厚賞故也唐貴妃史無傳不可考當即用以為殉者

憲宗廢后吳氏順天人都督同知俊之女天順八年七月立為皇后甫踰月以杖萬貴妃而廢正德元年薨后妃傳曰后薨劉瑾欲焚之大學士王鏊持不可

乃以妃禮葬

孝貞皇后王氏上元人阜國公鎮之女吳后廢遂冊為

皇后

餘詳皇
太后門

孝穆皇后紀氏賀縣人本蠻土官女成化中俘入掖庭
命守西藏帝幸之生皇子是為孝宗育於西內十一年
帝遣使迎皇子頒詔天下移妃居永壽宮是年六月暴
薨謚恭恪莊僖淑妃孝宗即位追謚為孝穆慈慧恭恪
莊僖崇天承聖純皇后

后妃傳曰妃生孝宗於西內時萬貴妃專寵而妬使門監張敏溺焉敏藏之他室憲宗自悼恭太子薨後鬱鬱不樂敏乘間言之憲宗大喜即日幸西內遣使迎皇子時已六歲矣妃抱皇子泣曰兒去吾不得生兒見黃袍有鬚者即兒父也及移居永壽數召見萬貴妃日夜怨泣曰羣小給我六月妃暴薨或曰貴妃致之死或曰自縊後孝宗時大學士尹直撰哀冊有云覩漢家堯母之門增宋室仁

宗之慟帝燕閒念誦輒歆歔流涕

賢妃柏氏生悼恭太子為萬貴妃所害

孝惠皇后邵氏昌化人父林

早沒世宗立封其弟喜為昌化伯

生興王

成化十二年封宸妃進封貴妃

餘詳皇太后門

恭肅貴妃萬氏諸城人錦衣衛指揮使貴之女幼選入掖庭及長侍憲宗於東宮成化二年封貴妃二十三年暴疾薨謚曰恭肅端慎榮靖皇貴妃

后妃傳曰妃善迎帝意讒廢吳后六宮希得進御

紀淑妃之死實妃為之及弘治初御史曹璘請削
妃謚號魚臺縣丞徐頊請逮治診視紀太后諸醫
捕萬氏家屬究問當時薨狀孝宗以重違先帝意
已之

臣等謹按諸王傳憲宗有張德妃姚安妃楊恭妃
潘貴妃史皆無傳不可考

孝宗孝康皇后張氏興濟人昌國公巒之女成化二十
三年選為太子妃是年孝宗即位冊為皇后

餘詳皇
太后門

武宗孝靜皇后夏氏上元人慶陽伯儒之女正德元年冊為皇后世宗嘉靖元年上尊稱曰莊肅皇后十四年崩謚曰孝靜莊惠安肅毅皇后十五年加謚溫誠順天偕聖

后妃傳曰后崩議謚大學士張孚敬曰大行皇后帝嫂也與累朝元后異宜用二字或四字李時曰宜用八左都御史王廷相吏部侍郎霍韜等曰均帝后也何殊禮部尚書夏言集衆議因奏曰古人

尚質謚法簡稱其行後人增加臣子情也
大行皇后宜如列聖元后謚二四及八於禮無據
帝不從再議羣臣請如孚敬言帝曰用六合陰數焉
於是上謚孝靜莊惠安肅六字後帝覺孚敬言非是
后謚不備不稱配武宗乃增謚

世宗孝潔皇后陳氏元城人泰和伯萬言之女嘉靖元年冊為皇后七年以觸帝怒驚悸崩謚曰悼靈十五年改謚孝潔隆慶元年上尊謚曰孝潔恭懿慈睿安莊相

天翊聖肅皇后

廢后張氏世宗第二后也初封順妃陳皇后崩冊為皇后嘉靖十三年廢十五年薨

孝烈皇后方氏世宗第三后也江寧人安平侯銳之女嘉靖十年三月冊為嬪張皇后廢冊為皇后二十六年崩謚孝烈隆慶元年上尊謚曰孝烈端順敏惠恭誠祇天衛聖皇后

后妃傳曰帝即位十年未有子張孚敬言古者天

子並立六宮三夫人九嬪二十七世婦八十一御
妻所以廣嗣也請博求淑女為嗣子計從之十年
三月方后與鄭氏王氏閻氏韋氏沈氏盧氏沈氏
杜氏同冊為九嬪冠九翟冠大采鞠衣圭用次玉
穀文冊黃金塗視皇后殺五分之一至期帝袞冕
告太廟皮弁御華蓋殿傳旨遣大臣行冊禮既冊
從皇后朝奉先殿禮成帝受百官賀蓋創禮也張
后廢方氏立為后封沈氏宸妃閻氏麗妃舊制立

后謁內廟而已至是下禮臣議廟見禮至期帝率
后謁太廟及世廟頒詔天下

端妃曹氏以宮婢楊金英謀弑帝被誅

曹妃有色帝愛之冊為端妃二十一年宮婢楊金英
等謀弑逆帝賴后救得免時帝宿曹端妃宮后命內
監捕宮人雜治言金英等弑逆王寧嬪首謀端妃雖
不與亦知謀時帝病悸不能言后傳帝命收端妃寧
嬪及金英等悉磔於市并誅其族屬十餘人然妃實

不知也

孝恪后杜氏大興人慶都伯林之女穆宗生母也嘉靖十年封康嬪十五年進封妃三十二年薨謚榮淑穆宗立上尊謚曰孝恪淵純慈懿恭順贊天開聖皇太后

臣等謹按諸王傳世宗有閭貴妃王貴妃盧靖妃江肅妃趙懿妃陳雍妃趙榮妃史皆無傳閭王盧三妃即嘉靖十年所冊為嬪者江趙陳趙四妃則不知何年所選皆不可詳考

穆宗孝懿皇后李氏昌平人德平伯銘之女穆宗為裕
王選為妃嘉靖三十七年薨帝即位謚曰孝懿神宗即
位上尊謚曰孝懿貞惠順哲恭仁儷天襄聖莊皇后

孝安皇后陳氏通州人固安伯景行之女嘉靖三十七

年選為裕王繼妃隆慶元年冊為皇后

餘詳皇
太后門

孝定后李氏涖縣人安國公偉之女神宗生母也侍穆

宗於裕邸隆慶元年三月封貴妃

餘詳皇
太后門

神宗孝端皇后王氏餘姚人永年伯偉之女萬曆六年

冊為皇后四十八年崩謚孝端光宗即位上尊謚曰孝
端貞恪莊惠仁明婉天毓聖顯皇后

孝靖后王氏永寧伯天瑞之女光宗生母也隆慶十年
封恭妃二十四年進封皇貴妃四十年薨謚溫肅端靖
純懿皇貴妃光宗即位詔議尊謚熹宗即位上尊謚曰
孝靖溫懿敬讓貞慈參天允聖皇太后

恭恪貴妃鄭氏大興人都督同知成憲之女萬曆初入
宮封貴妃生皇三子進皇貴妃神宗崩遺命封皇后禮

部侍郎孫如游爭之乃止崇禎三年薨謚曰恭恪惠榮和靖皇貴妃

臣等謹按傳言妃有寵於帝以生皇三子即進貴妃而王恭妃之子冊為太子尚未進封外廷疑妃有立己子謀羣爭國本章奏累數千百嗣是而憂危竑議之書及瘋顛挺擊之案起矣

昭妃劉氏

封年未詳

崇禎時尚為太妃十五年薨

神宗王皇后傳曰妃於天啟崇禎時居慈寧宮掌

太后璽莊烈帝事之如大母

臣等謹按諸王傳神宗有周端妃李貴妃史皆無傳不可考

光宗孝元皇后郭氏順天人博平侯維城之女萬曆二十九年冊為皇太子妃四十一年薨謚恭靖熹宗即位上尊謚曰孝元昭懿哲惠莊仁合天弼聖貞皇后

孝和后王氏順天人父鉞

當追贈史未載

熹宗生母也侍光宗

東宮為選侍後進才人四十七年薨熹宗即位上尊謚

曰孝和恭獻溫穆徽慈偕天鞠聖皇太后

孝純后劉氏海州人後籍宛平新樂侯應元之女莊烈帝生母也初入宮為淑女萬曆三十八年生莊烈帝後五年薨莊烈帝長追封賢妃及即位上尊謚曰孝純恭懿淑穆莊靜毗天毓聖皇太后

康妃李氏光宗選侍也光宗即位不豫命封為皇貴妃未舉行熹宗即位敕停封號天啟四年封為康妃久之始薨

臣等謹按傳言光宗力疾御煖閣命大臣封李選侍為皇貴妃未及封而帝崩時選侍以侍疾尚居乾清宮謀挾皇長子自重東宮伴讀王安以劉一燝誰敢匿新天子之言入白選侍乃抱皇長子出於是一燝周嘉謨楊漣左光斗等䟽請選侍移宮議數日移居噉鸞宮既而御史賈繼春以選侍失所具揭移宮一案遂成聚訟熹宗即位之初敕言選侍阻朕煖閣司禮監固請得出又使李進忠再

三趣回明欲要挾朕躬垂簾聽政且選侍毆崩聖
母自忖有罪不令朕與聖母舊侍交言今停封號
以慰聖母在天之靈已復削賈繼春籍是時委任
王安故敕諭如此久之魏閹亂政遂矯帝命封為
康妃復召繼春與前旨大異矣

莊妃李氏光宗選侍天啟元年封莊妃以魏忠賢客氏
用事憤鬱而薨

后妃傳曰宮中有二李選侍故以東西別之封康

妃者為西李此為東李莊烈帝失母光宗命東李撫視之

選侍趙氏光宗時未有封號天啟時為魏忠賢客氏矯旨賜自盡

臣等謹按諸王傳光宗有定懿妃王敬妃史皆無傳不可考

熹宗懿安皇后張氏祥符人太康伯國紀之女天啟元年冊為皇后莊烈帝立上尊號曰懿安皇后崇禎十七

年流寇陷都城后自盡

后妃傳曰后數於帝前言客魏過失客魏交恨遂
誣后非國紀女幾惑帝聽三年后有娠客魏盡逐
宮人異已者而以其私人承奉竟損元子後宮門
有匿名書列忠賢逆狀疑出國紀及被逐諸臣手
奸黨欲因此搖動中宮會有阻者事乃已
學士李國
搢言而止熹宗大漸折忠賢逆謀傳位信王者后
力也

據外戚
傳以大

朱彞尊曰甲申寇難朝野相傳謂懿安皇后不死
然我

世祖章皇帝實錄大書元年五月葬明天啟皇后張氏於
昌平州足以洗其冤矣

裕妃張氏慧妃范氏成妃李氏

張妃為客魏幽於別宮絕食而死范妃生悼懷太子
不育復失寵成妃李氏於帝前密為乞憐客魏知之
亦幽成妃於別宮以有豫藏食物半月不死斥為宮

人崇禎初皆復妃號

臣等謹按諸王傳熹宗有范貴妃任容妃史皆無傳不可考

愍帝愍皇后周氏蘇州人徙居大興嘉定伯奎之女天啟中選入信邸冊為妃帝即位立為皇后崇禎十七年京城陷帝命后自裁遂崩

大清定京師謚后曰莊烈愍皇后

貴妃袁氏父祐

未詳何封

當京師陷時帝令自盡絕而復蘇


大清定京師命有司給居宅贍養終其身

貴妃田氏陝西人後家揚州左都督弘遇之女崇禎元年封禮妃進皇貴妃十五年薨謚曰恭淑端惠靜懷皇貴妃

明史后妃傳曰太祖鑒前代女禍首嚴內教洪武元年命儒臣修女誡諭翰林學士朱升曰治天下者正家為先后妃雖母儀天下然不可俾預政事至於嬪嬙之屬不過備職事侍巾櫛恩寵或過則

驕恣犯分上下失序歷代宮闈政由內出鮮不為禍卿等其纂女訓使後世知所持守五年命禮臣議宮官女職之制禮臣言漢設內官二十四等凡數百人唐設六局二十四司官凡一百九十人女史五十餘人皆選良家女充之帝以所設過多命加裁定於是立六局一司局曰尚宮尚儀尚服尚食尚寢尚功司曰宮正皆正六品每局領四司其屬二十有四而尚宮總行六局之事戒令責罰則宮

正掌之官七十五人女史十八人視唐減一百四十餘人諸妃位號亦惟取賢淑莊敬惠順康寧爲稱終明之代宮壺肅清論者謂其家法之善超軼漢唐矣



欽定四庫全書

欽定四庫全書
卷二百一

五十三

欽定續文獻通考卷二百一